

# Igl president candidescha per la suprastanza svizra

Associaziun grischuna da pumpiers: Radunanza da delegos

DA GION NUTEGN STGIER / ANR

■ **Roland Farrér, igl president cantonal digls pumpiers, è nia confirmo an sies uffezi. Alla fegn da zarcladour duess el neir eligia ainten la suprastanza dall'Associaziun digls pumpiers svizzers. Igl 2018 en igls corps da pumpiers digl Grischun stos 1203 gedas an acziun.** Sonda passada èn sa radunos a Domat igls delegos digls 56 corps da pumpiers tgi dat aint igl Grischun. President dall'Associaziun grischuna da pumpiers è siva digl 2012 *Roland Farrér* da Stierva. Damai è el, schi lagn deir, igl pi «ot» pumpier grischun da chels 3869 pumpiers tgi vagn an noss cantun. Sa tgapescha tgi anc pi «ot» tgi Farrér è cunsiglier guvernativ *Peter Peyer*, el tgi magna siva da passa treis meis igl departamaint da gisteia, siertad e sanadad. A pled è er el nia tar la radunanza da delegos sonda passada a Domat. Igl cunsiglier guvernativ da Trin ò angraztgea agls pumpiers per la lavour prestada a favour dalla publicitad.

**I dovra ena buna tgira**

Igl 2018 en igls omens e las donnas digls 56 corps da pumpiers tgi vagn aint igl

Grischun nias clamors 1203 gedas. Scu tgi Farrér dei ins vegia igl davos onn gia ensatge daples incendis. An acziun èn igls pumpiers pero er nias tar accidents da traffic, tar cass elementars, tar donns dad ieli e perveia d'aviouls. Deplorablament vegian gist igls pumpiers digl sarvetsch stradal gia igl 2018 en pèr antops pi malampernevels tgi seian er ias profund a mintgign. Farrér discorra cò d'accidents sen veia noua tgi unfants on pers lour veta u er dalla crudada da dus aviuns cun ples morts. Igl president digls pumpiers grischuns dei tgi per buna sort ins vegia en schinumno «care team» aposta angal per igls pumpiers tgi sa nomna «Peer». A chella gruppa fetschan part persungas digl rom e tgi vegian l'experientscha tgi dovra per gidar e dar tgira agls pumpiers tgi vignan confrontos cun cass pi tragics ed er mortals. Farrér, el loda igl angaschamaint da mintga singul pumpier er percheigl tgi tots on anc ena veta da professiun d'esser commembers digl corp da pumpiers. Menziuno ò el alloura er la tgapientscha digls patrungs da tots pumpiers. Els sa mossan solidarics ed er tolerants schi l'egn u l'oter ampluia vegia an en colp da bandunar urgent igl post da



Roland Farrér (san.), igl president digls pumpiers grischuns, cun cunsiglier guvernativ Peter Peyer.

FOTO N. BASS



Daples incendis igl onn passo noua tgi igls pumpiers èn stos an acziun.

FOTO G. N. STGIER

lavour per adempier igl sies sarvetsch da pumpiers.

**Igl 1998 anc 10372 commembers**

Avant 21 onns veva l'Associaziun grischuna digls pumpiers anc 10372 commembers. Oz schea chel domber tar 3869 delts. La raschung tgi igl domber digls pumpiers è sa redutgia dad onn tar onn èn las fusions digls cumegns e cun chellas er las fusions digls corps da pumpiers. Da menziunar è er tgi aint igl decurs digls davos onns è er tar igls pumpiers nia tot pi professiun, igl equipamaint pi modern, la tecnica ò fatg en immens progress e la scolaziun è neida per en po miglra. Eneda davigl per ena Val angal en auto da pumpiers ed oz dispona ple u manc mintga corp da pumpiers aglmanc egn schi betg ples da chels vehichels «TLF» cun en equipa-

maint tgi corresponda allas preteias dad oz e tgi fò cunzont igl sarvetsch duevel. Chels vehichels costan bagn, èn dantant da gronda valour.

**En nov suprastant**

An tavla èn er stadas elecziuns dallas persungas tgi appartignan alla suprastanza cantunala digls pumpiers. Cun applaus on igls preschaints confirmo Roland Farrér scu president pigl bienni digls proxims treis onns. Vicepresident resta scu anfignen ossa *Nicolo Bass* da Strada. Da nov a chel gremi totga *Martino Corfu* da Lostallo tgi ramplazza *Daniele Corecco* da Buseno. Reelegias scu revisours èn nias *Georg Häfner* da Strada e *Bruno Murk* da Coira. Scu manadra digl post da gestiun segna anc adegna *Gilda Jäger-Iseppi* da Cunter.

**Christian Rathgeb nov commember d'onour**

Nia undro pigl sies angaschamaint anvers igls pumpiers è nia cunsiglier guvernativ Christian Rathgeb. Igl anteriour schef digl departamaint da gisteia, siertad e sanadad ò retschet la commembranza d'onour dalla Associaziun grischuna da pumpiers. Da chella undrientscha è el sa musso ple tgi ventirevel. Igl 2020 è en onn da festa per igls pumpiers da noss cantun cun aver l'uniun tetgala igl giubileum da 125 onns. La festa da giubileum cun bieras attracziuns ò li igls 6 da zarcladour 2020 a Tusang ed ella è publica. Aint igl decurs digl 2021 è l'Associaziun digls pumpiers svizzers giast an noss cantun cun salvar la sia radunanza da delegos aint igl Grischun.

## La midada d'energeia ò er avantatgs finansials

Ela+ mond d'energeia: Referat dad Anton Gunzinger tar la midada d'energeia

■ (pb) **Igl president dad ela+ mond d'energeia, cunsiglier digls cantuns Stefan Engler, ò dastgea beneventar glindesde passo 80 interessents ad en referat. Igl referent Anton Gunzinger ò en'atgna firma a Turitg tgi sa nomna Supercomputing Systems AG cun 120 collaboratours. Vetiers è el professor dalla ETH a Turitg. Igl tema digl sies referat è sto «la midada d'energeia».** Igl referat dad *Anton Gunzinger* è gist sto an en taimp tgi igl tema dall'energeia è top actual. Atgnamaintg ins stuess chintar er igl referent tar igls activists. Pero betg perveia da muteivs politics u perveia da muteivs emozionals. Chegl tgi mutivescha el per ena midada radicala dalla energeia fossila ed atomara tar l'energeia fotovoltaica e regenerabla èn deirs fatgs fisicals ed economics. E tenor igl referent è tot gio pront per far la midada. Las premissas èn tottas avant mang. Tiers chegl nignsa betg pi tgers cun midar igl noss auto da benzina u diesel sen egn tgi vo cun electric. «Cò è da spitgier igls proxims ca. quatter onns ena veira revoluziun. E chella vign dalla China», ò detg Gunzinger. Ed igl madem vala er per la midada digls noss scaldamaints dad ieli sen energeia regenerabla. Ma i vo betg angal cun midar las furmas d'energeia, mabagn d'ena vart cun spargner energeia. Gist tar igls bietsgs pi vigls tgi èn betg isolos scu tgi ins so far oz. Igl potenzial l'ò è anc grond. La strategia per contanscher tot chegl è: ef-

ficienza d'energeia. E da contanscher tot chegl ò anc en bel effect economic: Per igl singul consument e per la politica è la midada anc considerablamentg pi bungmartgeda tgi igl sistem energetic dad oz. Chegl è igl cuntign digl referat da Gunzinger resumio segl essenzial.

**«Veiver scu chegl tgi nous vagn vivia»**

Noua vo Gunzinger per la mutivaziun e per la persvasiun da pretender tgi la midada d'energeia seia gist schi simpla? El ò projecto ena fotografia tgi mossa el cun egn digls sies dus beadis: «Ja giaveisch tgi igls mies beadis possan veiver schi bagn scu chegl tgi ia va dastgea veiver», è sto igl sies commentari lotiers.

Igl referent pretenda tgi schi igl antier planet vivess scu nous Svizzers, alloura duvressans quatter planets per aver avonada energeia. La fegnameira agl rom dad ena energeia seia da redutgier an Svizra sen en mez mond. Ainten la sias declaraziuns è el betg s'interesso schi la tgossa è politicamaintg realisabla.

Igl migliuramaint antras izolaziun seia sa mido digl 1970 anfignen igl 2010 per igl factor 6. Igl bietsgs tgi son anc neir sanos energetcamaintg an Svizra èn anc 7% da tot igls bietsgs. La rata da sanaziun seia oz 1,1% ed oramai gessigl anc 70 onns. La rata tenor las directivas dalla confederaziun vess dad esser 2%. Alloura gessigl anc 33 onns. Ma el sez è persvadia tgi 4% ad

onn fissan pussebels, alloura duvressigl anc 19 onns anfignen tgi tot igls bietsgs fissan sanos.

Tenor Gunzinger eran igls costs per scaldar cun ieli e cun sondas dalla tera resp. pompas da caleira madem ots igl 2011. Siva d'alloura è ieli pi tger.

**La mobilitad**

La reit electrica an Svizra ò ena valeta da nov da ca. 60 mia. ed igls costs annuals èn 4,5 mia. La reit da veias ò ena valeta da nov da 600 mia. Igl costs annuals montan a

ca. 45 mia. Igl chint stradal uffizial seia 8,7 mia. I seia damais cler tgi igls rest paiains cun daners da taglia.

La surfatscha da tot igls bietsgs an Svizra seia 400 km<sup>2</sup>. La surfatscha da tot las veias seia 900 km<sup>2</sup>.

Tar la mobilitad vogl per redutgier las emissiuns da CO<sub>2</sub>. E per igls costs cumparagles tranter ieli ed electric/solar. Er igl onn 2010 erigl madem tger. Siva dad alloura è electric/solar pi bungmartgea. Las emissiuns da CO<sub>2</sub> èn cleras e chegl per igl factor 8 an favour digl e-mobil calculo

er la producziun. Tar igls autos electricas era la batteria ena pulita sfida: ossa betg ple.

**Quanta electricitad duvrainsa?**

Scu tgi igl referent ò explitgia dovra la Svizra igl onn 2035 en quantum dad electricitad da 65 TWh/a, chinto igl augmament dalla populaziun sen 10 miu. Oz vignan 40% da chels dad ovras atomaras. Chels valigl da ramplazzar. Igl potenzial dall'energeia solara calculescha Gunzinger cun 30 TWh/a, igl potenzial da vent cun 10 TWh/a e da biomassa da 6–10 TWh/a.

Novas ovras atomaras vei igl referent betg scu en'opziun percheigl tgi las societads èn gio oz an difficultads finansialas e la dismessa vign adegna pi tgera. Ed i savess neir tar igl pi grond desaster finansial tgi la Svizra ò ansomma gia. Ed alla fegn a costs digl paiataglia.

L'energeia regnerabla vegia anc tant potenzial. Tenor populaziun seia la Svizra en promil dalla populaziun mundiala. Puncto producziun dad energeia regnerabla ins contribuescha pero en procent. Ins seia gio bagn sen veia.

Betg tots alla ETH seian puncto energeia digl madem meini scu el. Gunzinger ò er scretg en codesch cun igl tetel «Kraftwerk Schweiz», ein Plädoyer für eine Energiewende mit Zukunft.

Igl sies referat ins pò scarger scu pdf sen la homepage «<https://ela-energiewelt.ch/home.html>»



La midada d'energeia è tecnicamaintg pussebla gio oz. Chegl è la ferma persvasiun dad Anton Gunzinger tgi ò referia a Savognin tar ela+ mond d'energeia.

PDS